



DEO OPT. MAX.

UNI ET TRINO,

VIRGINI DEI-PARÆ, ET S. LUÆ,
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS,
*manè discutienda in Scholis Medicorum, die Martis vigesima-quarta
mensis Martii Anno Domini M. DCC. LXVII.*

M. JOANNE MAC-MAHON,

Antiquo Exercituum Regis & Nosocomiorum Militarium Medico,
Regiæ Scholæ Militaris Medico ordinario, Doctore Medico, Præfide.

An in lecto undique clauso dormire noxium ?

I.



URA & ineluctabili necessitate ad laborem natus homo,
membra sudoribus & vigiliis exhausta quieti committere
& sopori tenetur. Hoc unicum malorum illius solatium;
quo sublato, nec vires refarcire, nec labores novos sus-
cipere valebit. Frustra reluctari conaretur; sunt sua na-
turæ jura quibus fraudatam se nunquam finit. Illâ lege
coacti, nondumque mala undique circumstantia providentes primi

A

nostri parentes , humi stratis membris & sub dio decumbebant. Nulla hora, nullus locus somnum jubeat, hancque solam operum metam agnoscebant, cum nempè laborem sessa membra recusarent, ultroque Terram peterent elanguida, hæcque terræ pars, illis erat eâ nocte somni sanctuarium. Tandem propriâ experientiâ edocti, damnoque suo prudentes facti, cubacula adstruere ceperunt variosque lectos fabricare, quibus ab aëris intemperie terræque noxio madore vindicaretur. Hi primi lecti unico necessitatis stimulo fabrefacti, folique dicati somno, mollitiem, variosque inde sobolescentes morbos fovere non poterant. Sed brevi voluptas ut morum sic & sanitatis populatrix, salubrem hanc duritiem exuere nos coegit, strataque super strata plumularum ingendo, inutilem quin & noxium nobis obtulit somnum; quo corpus, effratum nulloque vigore refarcitum à somno ad quietem surgit. Et utinam hæc sola essent voluptatis inventa! Quid autem in generis humani perniciem non machinatur hostis ille eo magis timendus quo jucundiores nobis offert ruinam, Velaminibus undequaque, specioso aërem frigidum arcendi, somnumque profundiores invitandi, consilio, hi lecti obducuntur, quorum ope reverà aëris interni cum externo commercium intercipitur. Quâ pessimâ methodo, nedum morbi arceantur, infinita emergere incommoda contendimus nobisque probandum incumbit.

I I.

VITAM duo status physici sibi invicem oppositi dividunt, vigilia nempe & somnus. In utroque vero statu, licet somnum mortis imaginem quidam prædicent, itidem vivit homo, exceptisque functionibus quæ ab animâ & voluntate pendunt omnes sere alias, quæ vitales naturalesque dicuntur, exercet per somnum, fortasse & felicius quam dum vigilat. Harum functionum denominatio sola illarum importat secum utilitatem & momentum, quibus scilicet deficientibus, aut subito, aut brevi saltem tempore machina corrumpitur. Hæ functiones sunt Respiratio, Circulatio, Digestio, & aliæ quædam, quibus sublatis, licet ad vitam actualem non sint absolute necessariae, subito tamen sanitas deficit; nutritio nempe & perspiratio insensibilis, à cujus præsertim functionis læsione quot incommoda scaturiant vix credibile. Igitur probè exerceantur omnes illæ functiones maximi est momenti. Ut autem 1º, perfecta sit respiratio, à quâ circulatio ita pendet, ut unâ cessante cesset & altera, aër debet esse paucioribus quam fieri potest particulis tum vapidis tum exhalatis onustus, ea scilicet ratione ut suum fervet elaterium, quæ virtus absolute requiritur in aëre ut pulmones ab illo distendantur, sanguis vasa pulmonalia subeat, in illis convascetur, elaboretur, in minores globulos discerpatur, sicque circulationi, nutritioni, variisque aptus evadat secretionibus. 2º. Ut fiat perspiratio intra somnum adæquata, æqualis ac moderata esse debet circulatio quæ tota ut jam diximus à respiratione pendet. Oportet præterea ut pori cutis liberi & patentiores excretioni cutaneæ faveant. Hæc autem omnia ut corpus sanum & vegetum sic & aërem quantum fieri potest serenum requirunt.

JAM vero in lecto undique clauso, brevi vaporibus tum ex pectore tum ex poris cutis continuo exhalantibus, aer contentus, cessante illius cum externo communicatione, coinquinatur, suumque amittit elaterium. Elasticitas enim aeris est illa proprietas qua condensari & expandi valet, ideoque reactionem actioni habere aequalem. Ut autem aer innatam hanc sibi servet proprietatem, necesse est ut continuo & aequali nisu in se invicem ferantur spirulae aereae, eodemque nisu in se ipsas resiliant hoc perpetuo motu perpetuo renovatur elasticitas, aere elastico facile distenduntur vasa aerea pulmonum, sicque perfecta evadit & sincera respiratio. Si vero imminuatur aeris calore jam nimium rarefacti quantitas, nec exitus detur moleculis tum ex pectore tum ex poris cutis exhalantibus, ut sit in lecto undique clauso, tunc moleculae illae spirulis aereis interpositae illarum in se invicem impulsu minuantur; cum autem nulla sit sine actione reactio, utraque delebitur proprietas nullaque proinde erit elasticitas aut saltem paucissima, unde aer ille virtute sua orbatus, vehiculumque molecularum exhalatarum, factus, pulmones nisi magno cum nisu dormientis distendere non valebit. In nilibus autem illis saepe etiam frustra tentatis quomodo se habeat circulatio facile concipitur. Vasa nempe sanguinea pulmonum a vasorum aereorum collapsu compressa, nullum aut difficillimum sanguini ingressum offerunt. Oportet igitur ut sanguis qui totam pulmonum substantiam permeare debet iter ipse sibi aperiat impetuque suo totius illius massae resistantiam superet, quod nec subito nec nisi magno cum molimine effici potest. Unde per saepe cordis palpitationes a nimia sanguinis in ventriculis ingurgitatione & remora, hinc aliquoties etiam vasorum capillarum disruptio sanguineaque expulsiō. Sed cedo illa non eveniant incommoda, non ideo melius se res habebunt. Quomodo enim in vasis sic undique pressis conquassari & elaborari poterit sanguis? Quod nam ab aere sic corrupto elaterium accipiet? Igitur effatus ut antea, nullique nutritioni nec secretioni aptus ad cor revertetur. Praeterea aer ille materiam excernendam quin & excretam, rursus tum per poros cutis absorbentes, tum per vasa aerea pulmonum humoribus nostris immiscendo, pravis digestionibus procreandis, variisque fovendis morbis putridis est aptissimus; nihil enim e corpore excernitur in statu naturali quod non sit illi nocivum.

I V.

AD illam autem humoris nocivi excretionem, cui tempus nullum commodius quam somnum placidum affirmat sanctorum cujusque necessitas, ab immensa illius emissionem patet, multum facere aeris conditionem ex duplici ratione constat. 1°. Quia perspiratio a circulatione pendet. 2°. Quia illius excretionis emunctorium universale est cutis. Igitur pro vario sanguinis motu, provaria cutis dispositione varia exurgit illa functio. Sed 1°. ex probationibus superioris paragraphi aer inclusus nunquamque renovatus circulationi maxime noxius est, ergo ex iisdem rationibus & perspirationi nocere debet. 2°. In lecto undique clauso vapores de pectore & ex cutis poris exhalati spirulis aereis ut jam dictum fuit interponuntur. Cum autem moleculae illae, aere, aliunde ca-

lore jam rarefacto multo sint ponderosiores necessario in dormientis sinum relabi tenentur, parsque earum tenuissima per poro cutis intus re-
forbetur, pars vero crassior, cum illa vasa exigua subire non valeat toti
corporis superficiei adhæret brevique tempore exsiccat; ex illâ autem
exsiccatione obstructio necessaria nascitur in poris excernentibus cutis,
aliunde propter circulationis vitium obicem hunc superare non potest
fluidum perspirabile; igitur omnimode intercipitur perspiratio. Quot
autem morbi ex illâ suppressione exurgant, nimia eheu! experientiâ
docemur. Vix enim aliam agnoverint causam lassitudines in artubus,
capitis gravitates, digestiones laboriosæ & infinita hujusce modi in-
conmoda quæ omnia ex improbâ illâ quam impugnare conamur me-
thodo emergere quotidie videmus,

V.

SED jam à mulierculis hominibusque delicatulis objectiones moven-
tur. Calor inquit necessarius est ut placidus & utilis sit somnus.
Aer frigidus cautissime à corpore non vestito & dormiente arcendus est.
Aëris externi intromissio oculos fluxionibus afficit membraque rheuma-
tismis cruciat. Invieta ne igitur hæc argumenta putatis? Eâdem utinam
facilitate ac vestræ objectiones evertatur vestrum systema! 1°. Quidem
duas primas objectiones una solvet responsio. Vobiscum calorem ne-
cessarium per somnum, æremque frigidum à corpore non vestito & dor-
miente arcendum fatemur, sed modus est in rebus. Calor ille nimius
aërem suis spoliis virtutibus, necum utilis sit & contra perniciosus &
exitialis evadet. Igitur calore moderato utatur dormiens non vero seip-
sum obruat; nullæ ergo adversus nostram sententiam illæ duæ objectio-
nes, sed tertia nobis superest eruenda. Certum est enim aërem frigidum
oculorum fluxiones & rheumatismos procreare. Sed certum est etiam illa
evenire incommoda quia aëri externo nimia permittitur introductio, certum
est etiam fluxiones & rheumatismos non tam ab aëre in conclavi incluso
quam ab aëre per fenestram imperfecte clausam aut per foramen quod-
cumque irruente oriri, aut etiam à parietibus cubiculi madidis quæ
omnia certe non proponimus. Igitur alta sit lecti umbella ut major in
illius capacitatem penetret aëris quantitas. Collocetur lectus in ampliori
conclavi aliunde clauso, sed quædam semper ad pedes aut ad latera lecti
servetur apertura quâ cum externo aëre communicare possit aër internus
sicque semper renovari, alioquin suppra memorata irruent incommoda
quorum enumeratio & pericula ad conclusionem nos ducunt.

Ergò in lecto undique clauso dormire noxium.

Proponebat Parisiis LUDOVICUS-HENRICUS BOURDELIN,
Parisiensis, Saluberrimæ Facultatis Parisiensis Baccalaureus. Theſeos
Auctor. A. R. S. H. 1767. A sextâ ad meridiem.